



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

22. Kalenderwoche – ab 30. Mai 2010

E Lähm fiehr de Sache

Es dud Leide gähm, die ihr ganzes Lähm eenor eenzschn Sache vorschreim dun. Jedzde ma nisch hinsischdlich dor Bardnorschafd... vonweesch - bis dass dor Dod eisch scheidn dud!

Diesbeziechlich hab isch misch ja ganz meinor Gudstn vorschriem. Schdaadlich vorbrieff!

Nee, Isch meene jedzde ma Leide, die sich eene wischdich Offgabe rausgesuchd ham un die die dann e ganzes Lähm lang zu leesen versuchen. Ohne Bause un Unnorlass!

Die widmen sich zum Beischbiel dähm Kambf geeschn das Unreschd in dor Weld...odor dähm Kambf geeschn de Krangheid in Afriga, wie dähr Albord Schweidzor zum Beischbiel... un annre widmen ihr Lähm dor Kunsd... odor dor Wissenschaft, wie dor alde Einschdein... odor dähm Kambf fiehr dähm Sozialismus wie dor alde Erisch... odor dähm Kambf um... nee, dor Kambf um meeschlichsd viel Gewinn un Kabidahl... nee, das is jedzde nisch so eene Offgabe, die isch meene. Solsche Leide, die so eene werglich wischdische große Offgabe zu leesn vorsuchn, die dun ja sogahr offd off das Gewinnschdrähm vorzischdn. Ja, die obforn sogahr ihre Erbschafd un annre Erschbarnisse fiehr de Leesung von dähr Offgabe, dähr se sich widmen dun. Die dun sozusachn wedor Miede noch Middl scheun un sinn am Ende manschma ganz arme Schweine un schderm einsam un vorlassn. Fiehr ihre große Sache!

Ja, un so een wundorsamen Mänsch due isch ganz bersehnlich kenn - dähr dud bei uns in dor Schräborgardnanlache dähm Gardn undn am Deisch ham. Mir sachn Emil zu dähm. Mid Nachnahme is dähr mir gahr nisch bekand. Emil dud ja ooch reischn!

Dähr nähmlich dud sei Lähm dähm Kambf geeschn das Gras un ähnliches Grienzeisch widmen.

Dähr dud wedor Kosdn noch Miehe scheun! Kaum dud im Friejjahr, wenn dor Schnee weg is, was Grienes dähn Kobb aus dor Ährde hervorschdregge n, schdehd dor Emil mid seine Gerädschafd n bereit, um dähm unerwinschdn Grien dähn deschnischn Garaus zu machn. Nee, manuell mid de Fingor dud dähr nischd anfassn. Dähr had e Arsenal von Kambfgeräde... da is de Bundeswähr e armseelischor Haufn! Ooch was schemische Waffn bedreffn dud... dor Emil is ausgerisded geschn alle Angriffe aus dor Ährde un aus dor Lufd! Zum Beischbiel wenn im Härbsd de Bläddor von de Beeme schderzn dun un dähm Emil sein Gardn vorwiesdn, dann had dor Emil een Schdaubsauchor... also een Bläddorsauchor, da dud kee Bladd ibrisch bleim. Odor das Grienzeisch in de Fuchn von de Gehweschbladdn... da had dor een gasgedriehmnen Flammenwärför. Ansonsdn nadiehrlich Rasenmähor allor Sordn. Ooch Bräzissionsmähor geschn griene Derrorgrubbn un Bardisahren, die sisch hinnor Schdeene un zwischn de Gulduhrpflanzn vorschdegn wolln. Un dann hadd dor Emil ooch beschd immd noch zwee drei Geheimwaffn! Jednfalls bin isch sähr geschbandd, ob dor Emil sein Kambf gewinn dud. Abor dass de Nachweld ihm daderfiehr dann e Denkmahl sedzn dud, so wie dähm Einschein zum Beischbiel, das gloobsch nisch!

Eduard Sachsenmeyer